

Na osnovu člana 205. Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“, broj 6/06, 75/06, 44/07, 84/09) ministar komunikacija i transporta Bosne i Hercegovine donosi

## **NAREDBU**

### **O HOMOLOGACIJI VOZILA U POGLEDU ELEKTROMAGNETSKE KOMPATIBILNOSTI**

#### **I PODRUČJE PRIMJENE**


##### **Član 1.**

Vozila kategorija L, M, N i O, te sastavni dijelovi ili zasebne tehničke jedinice namjenjene za ugradnju u ova vozila (sa ograničenjima iz tačke 4. ovog člana) u pogledu elektromagnetske kompatibilnosti moraju biti homologovana u skladu sa ovom naredbom.

Elektromagnetska kompatibilnost označava mogućnost nekoga vozila, sastavnog dijela (sastavnih dijelova) ili zasebne tehničke jedinice (zasebnih tehničkih jedinica) da zadovoljavajuće funkcionišu u svom elektromagnetskom okruženju bez unošenja nedozvoljenih elektromagnetskih poremećaja na bilo šta u tom okruženju.

Električni/elektronski podsklop (ESA) označava električni i/ili elektronski uređaj ili skup (skupove) uređaja koji su zajedno sa pridruženim električnim spojevima i ožičenjem namijenjeni da budu dio nekoga vozila i da obavljaju jednu ili više specijalizovanih funkcija. ESA se može homologovati na zahtjev proizvođača ili njegovog ovlašćenog predstavnika kao „sastavni dio“ ili „zasebna tehnička jedinica (STU)“

Primjenljivost ove naredbe na električne/elektronske podsklopove (ESA)



Odredbe ove naredbe odnose se na:

(a) zahtjeve u pogledu otpornosti na poremećaje koji se šire zračenjem ili provođenjem za funkcije vezane za neposredno upravljanje vozilom, vezane za zaštitu vozača, putnika i drugih učesnika u saobraćaju i vezane za poremećaje, koji bi mogli uzrokovati pometnju kod vozača ili drugih učesnika u saobraćaju;

(b) zahtjeve u pogledu upravljanja neželjenim emisijama zračenjem i provođenjem radi zaštite namjene električne ili elektronske opreme samog vozila ili pridodatih vozila ili bliskih vozila, i upravljanja poremećajima od pribora koji može biti naknadno ugrađen na vozilo.

## II ZAHTJEVI

### Član 2.

Jednoobrazni uslovi za vozila kategorija L, M, N i O, te sastavne dijelove ili zasebne tehničke jedinice namjenjene za ugradnju u ova vozila iz člana 1. ove naredbe koji podliježu ispitivanju, metode ispitivanja, način vršenja kontrole saobraznosti serijske proizvodnje sa homologovanim tipom, postupak i način uzimanja uzoraka serijske proizvodnje, sadržaj izvještaja o ispitivanju radi izdavanja saopštenja o homologaciji, izgled homologacijske oznake i obrazac saopštenja o homologaciji dati su u Jednoobraznim propisima koji se odnose na homologaciju vozila u pogledu elektromagnetske kompatibilnosti (Pravilnik broj 10 Ekonomske komisije za Evropu Organizacije ujedinjenih nacija, u daljem tekstu: ECE pravilnik br. 10), sa važećim izmjenama i dopunama koje je prihvatila i primjenjuje Bosna i Hercegovina, donesenim na osnovu Sporazuma o usvajanju jednoobraznih tehničkih propisa za vozila sa točkovima, opremu i dijelove koji mogu biti ugrađeni i/ili korišćeni na vozilima sa točkovima i uslovima za uzajamno priznavanje dodijeljenih homologacija na osnovu ovih propisa ("Službeni glasnik Bosne i Hercegovine", broj /2010).

ECE pravilnik br. 10 u izvornom obliku (na engleskom jeziku) dostupan je u Ministarstvu komunikacija i transporta Bosne i Hercegovine, odnosno kod organizacije određene za obavljanje administrativnih poslova u oblasti homologacije.

## III HOMOLOGACIJA I ISPITIVANJE

### Član 3.

Homologacija vozila kategorija L, M, N i O, te električnog/elektronskog podsklopa u smislu ove naredbe vrši se na uzorcima tipa obuhvaćenim ovom naredbom.

Homologacijska ispitivanja vozila kategorija L, M, N i O, te električnog/elektronskog podsklopa u pogledu elektromagnetske kompatibilnosti u smislu ove naredbe može provoditi samo laboratorija ovlašćena od strane Ministarstva komunikacija i transporta Bosne i Hercegovine.

## IV PROVJERA USKLAĐENOSTI

### Član 4.

Provjera usklađenosti vozila sa zahtjevima ove naredbe provodi se prema postupku koji je propisan Pravilnikom o homologaciji vozila, dijelova, uređaja i opreme vozila („Službeni glasnik BiH”, broj 41/08).

Pri provjeri usklađenosti novoproduzvenih i korišćenih vozila prihvataće se homologacije dodijeljene u skladu sa serijom (serijama) izmjena i dopuna ECE pravilnika br. 10 prema Odluci o najnižim tehničkim zahtjevima za novoproduzvena i korišćena vozila pri homologaciji tipa vozila i homologaciji pojedinačnog vozila, koju će donijeti ministar komunikacija i transporta Bosne i Hercegovine.

## V PRIMJENA

### Član 5.

Ova naredba stupa na snagu osmog dana od dana objavljivanja u „Službenom glasniku BiH”.

Danom stupanja na snagu ove naredbe prestaje da važi „Naredba o ratifikaciji Pravilnika br. 9 i Pravilnika br. 10 koji se odnose na homologaciju vozila u pogledu buke i u pogledu sprečavanja radio-smetnji”, „Jednoobrazni propisi koji se odnose na homologaciju vozila u pogledu sprečavanja radio-smetnji” („Službeni list SFRJ-Međunarodni ugovori i drugi sporazumi”, broj 16/72).

Ministar

.....  
mr sc. Rudo Vidović